

# Significaziun dil tiern da giubileum

(pictura da commember Paul Mathias Cathomas)

Las epocas dall'uniun ein puntgadas figurativamein e glischadas abstractamein denter crenas-crap. Suravi para il temps da serentar in amen entras la scripziun da 75 onns giubileum. Il num **GREINA** ei dividius en tiarzas. Ils 3 pèrs da letras ein relevants en la verticala sco suonda:

Text surprender

Text surprender

Text surprender

Gl'entir greppagl el senn da tiern, porta el horizont la medaglia dall'uniun sco in suleagl cun forza da gravitaziun per **evoluziun, uniun, num GREINA, schurmetg da selvaschinas, regl da catscha, natira e patria.**

## CRONICA GIUBILARA 1938 -2013

(remessa entras il commember Paul Mathias Cathomas)

### SUTTETG, TGINA, ESSER, BATTEN E SVILUP dall'Uniun da catschadurs GREINA

#### IL SUTTETG PRIMAT

L'evoluzin dall'uniun tonscha ragischs giu el trasch d'anno 1914. Quei onn han biars catschadurs sumvitges empruau da survivor meglier viers gl'inimitg temius per catscha da revier. Els han encuretg sustegn tier la nova uniun da catschadurs da vallada, quella per l'entira Cadi ed enzatgei intschess viers Rueun e Sursaissa.

Loschamein per Sumvitg sco metropola, portava ella il num GREINA e fuva mo in onn pli giuvna che la superiura cantunala. Il fil cun l'OBRIKKEIT“a Cuera fuva empunius e las speranzas per in sedustar perifer, carschidas.

Igl emprem president ei stau in da Trun, numnadamein Anton Tomaschett-Lombriser. Sco fervent defensur dall'uniun da regiun, valeva denton in da Sumvitg



Paul Mathias Cathomas 1960

ella persuna da mistral Georg Cajacob. Malgrad buca catschadur fuva el commember e siu meini per gl'interess da catscha sursilvana vegneva respectaus cun eminenza d'advocat e deputau dil Cussegl grond.

La historia dall'Uniun da catschadurs Tumpiv menzionescha per anno 1919 in diember da 58 commembers. Ord paregl dil cronist fuva Sumvitg representaus cun presapauc in sisavel participonts.

## LA TGINA INDIGENA

**1938** 21 catschadurs dalla vischnaunca da Sumvitg daventan partisans e bandunan l'uniun dalla Cadi. Ils 29 da settember fundeschan els in'uniun da catschadurs locala, quella da Sumvitg. Il protocol da fundaziun menziunescha: "Ei mondi per che tuts catschadurs seigien sil current tgei che cuori ton dall'uniun GREINA sco tier l'indigena. Il num GREINA hodiern resta denton aunc occupaus per l'anteriura dalla Cadi.

Buca tuts catschadurs dalla vischnaunca suondan e daventan fundaturs. Entgins retuornan tier l'uniun veglia per pagar anavos piccas persunalas. Ei vegn fantisau e schau vanzar dapli siemis che semiaders.

L'emprema suprastonza menziunescha gl'origin sco suonda:

**President : Gion Battesta Degonda da Cumpadials**

**Actuar: Georg Bundi da Surrein**

**Cassier: Gion Battesta Deplazes da Surrein**

Cuort sissu rinforza ina buna catscha comunabla la nova cassa. Las loschas predas ein; 2 camutschs, 2 cavreuls ed ina tschiarva. La facultad dil november concluda cun 193 frs. e 50 cts. sco era cun in dabien da 3 frs. e 50 cts. per carn aunc buca pagada.

**1939** Gia ils 27 d'uost meina la giuvna uniun atras igl'emprem tir numnaus "fiasta da tiradurs." Quella fa davos giu 11 frs. e 40 cts.. Il settember furia la secund' uiara mundiala. Ils catschadurs ston brattar la biala catscha grischuna cun gl'infinet survetsch militar, per pertgitar ils confins svizzers. Las selvaschinas gaudan aschia in avantatg provisoric. La carn vegn razionalisada e confidada al stgir dalla notg. Il temps da congedi vegn nezegiaus per nutrir la famiglia, decorar la combra da carn, far pli gustus ils truffels e tgirar il vezi da catscha. Scadin saveva tgi ch'el entupava.

**1940** La giuv'uniun regala a scadin che ha priu part dalla catscha comunabla 6 patronas cargadas.

## IGL ESSER CANTUNALS

**1945** Alla radunonza generala dils 9 da december a Breil, declaran ils delegai dall'Uniun da catschadurs Sumvitg alla superiura da vallada d'esser in uniun per sesezza e d'entrar suveranamein en l'uniun cantunala. Els fan valer l'indentidad dil num GREINA sco lur sulet dretg da possess. „La generala,, teidla, pren enconuschientscha e surlai la midada dil num alla peda dil temps. L'uniun al laupiet dalla Greina entra promptamein gl'onn sissu ell'Uniun cantunala sco Uniun da catschadurs SUMVITG.

La catscha communabla vegn remunerada cun la preda da dus tschiarvas ed in camutsch.

Il catschadur Bernhard Saluz da Domat, che fuvà staus sparius duront catsch'aulta, procura era el cudisch da protocol per ina viva discussiun. Denter auter hagi la tschontscha fatg la currella da buca esser excludus che catschadurs hagian sittau giu il Saluz. Plirs suspectai datan lien perdetga publica per lur alibis.

La bara vegn anflada pér suenter 8 dis entadem Naustgel, curclada cun neiv nova e squatschs. La buis dad in valet dalla Muntanera liber pér gl'uoost sissu. Il disfortunau empau jasters e bandunaus fuvà ruclus alla mort duront bischa e brentina. Perfin advocats fuvan interessai dil cass dil "bunameindismess".

- 1946 Il schaner vegnan novs statuts cun 20 artechels approvai ed adattai allas perscripziuns cantunalas.  
La catscha communabla en la regiun da Laus vegn encorunada cun 2 tschiarvs da mintgamai entuorn 180kg.
- 1950 La radunonza generala dil cumin spossaus ei madira da renunziar il num GREINA en favur dils catschadurs da Sumvitg. Vigur seigi gl'onn proxim. Cun risguard dallas extradadas precedentas da Mustér, Tujetsch, Val Medel e Trun, numna la radunonza quei cantun giudem la Cadi, la Secziun da catschadurs TUMPIV.

## IL BATTEN TARDIV

- 1951 Suenter la desiderada decisiun dil december 1950, astgan ed astgassen ils catschadurs da SUMVITG duvran il num GREINA. Ussa selubeschian els denton dalla peda en abundonza. Pér dus onns pli tard concludan els unanimamein la midada dil num. Las davosas nuorsas piarsas sezeivran encurend in suttetg en la zona indigena. Il temps ha reteniu, migliurau e perschuadiu.

Il cassier Gion Giusep Candinas da Sumvitg menziunescha ina contribuziun annuala da 18 commembers. Ner sin alv remetta el in manco da 85 frs. e 95 cts. fatgs entras la tscheina da catschadurs dils 30 da settember.

## SVILUP E CARSCHEN

- 1953 Il cudisch da protocol noda in diember da 25 commembers.  
Cun dus onns retard drova l'uniun definitivamein il num GREINA enstagl SUMVITG (mira anno 1951)
- 1955 L'uniun meina atras a Surrein en casa da scola il teater, numnaus igl „Uors da Valesa," inscenaus da Benedetg Caminada da Mustér. Vinavon concluda ella da lubir domicil a capricorns sin siu intschess da Sumvitg.
- 1956 Sco la fluriziun suenter ina purgina, para l'uniun GREINA da pigiarar. Per exempel Christoffel Degonda da Cumpadilas vegn elegius president per 1957
- 1957 Ils commembers concludan alla radunonza dils 12 da matg da schar liber las vaccas-tschiarva gl'entir temps da catscha

- 1959 Il scamond da carrar en Val Sumvitg a catscha cun auto laventa gronda malaveglia tier la radunonza dils 21 da mars.
- 1960 La radunonza dils 10 da schaner astga beneventar 7 commembers novs.  
22 catschadurs prendan part dalla catscha comunabla si l'alp da Laus, Uldauna, Rumpischi ed ellas Ruinas. Quei atun viseta l'uniun Losanna siu fervent commember e hotelier Ernest Baselgia. Denteren sesanfla era gl'emprem cassier Gion Battesta Deplazes da Surrein.
- 1965 L'uniun crescha per 6 commembers novs. La discussiun per ereger starlieras e pever selvaschinas duront nevadas s'actualisescha. Tschun asils da catscha vegnan tractai da niev ni midai.
- 1966 Ella radunonza dils 7 d'uost rapporta il survigilader Christoffel Degonda sur la „malsogna dils egls denter camutschs“el territori da Cazereuls e Muraun. L'uniun approbescha novas statutas cun reselvar in meins temps da recuorer.
- 1968 Per proteger la descendenza dueigien las vaccas-tscharva vegnir serradas naven dils 21 da settember.
- 1969 Cun enzatgei retard festivescha l'uniun el hotel Surselva a Rabius siu giubileum da 30 onns. Ils fundaturs aunc vivents vegnan undrai cun ina plachetta commemorativa.  
L'uniun astga recepir 7 commembers novs ed undrar 5 commembers d'honor, tuts fundaturs primats.
- 1970 La radunonza dils 23 da matg tracta entras curreger ni fundar da niev ,7 asils da selvaschinas, denteren era il niev asil federal cul num Péz Vial. Gl'atun viseta in grond rosch commembers cun lur dunschalas il parc nazional e stattan sur notg a Zernez.
- 1971 Il niev asil federal da selvaschinas cul num Péz Vial vegn introducius sin intschess dallas duas uniuns GREINA e VALLATSCHA, ni precisau dallas vischnauncas Sumvitg e Medel/Lucmagn. Ord vesta dils iniziants da Sumvitg dueigi quel impedir al militer da bumbardar vinavon cun canuns grevs la part odem dalla spunda settentriunala ella cadeina dil Péz Vial.
- 1972 Igl'emprem president dall'uniun da catschadurs SUMVITG , Gion Battesta Degonda da Cumpadials, miera cun honor da fundatur en la vegliadetgna dad 80onns.
- 1975 L'uniun fa ina excursiun da stad si la camona da Medel ed il viadi autunil a Losanna tiel hotelier e generus commember Ernest Baselgia. Ina zucca da carschen semuossa. La radunonza generala astga recepir 8 commembers novs.
- 1977 A Clavadi eregia l'uniun ina starliera nova en lavur cumina dils commembers.  
La radunonza generala beneventa la recepziun da 7 commembers novs.

- 1978 L'uniun ensemen cun l'antieriura societad da tir Vial Sumvitg concludan in project per in stan da sittar sin distanza da 100m a Sulagval. Quei niev baghetg sigl uor alla riva seniastra dil Rein Val, sco era il stan da Schibas vanzaus vi ella cunterriva entras l'antieriura societad da tir Surrein, d'ueigien survir communablamein. Las lavurs sextendan ellas stads dils onns sissu.
- 1979 A Surrein en casa da scola veglia organisescha l'uniun il november in sault cun exposiziun da trofeas, da selvaschinas ed utschleglia, preparadas. Era il svilup d'armas ed il diever da fallas vegn presentaus. Las fallas sezzas fuvan cuvretgas cun ruina epocala da presapauc 30 onns. Cun relativ aults recavs per uolps e fiergnas, han quellas giu segidau principalmein els onns (19/30/40) cun grondas famiglias ad in viver empau meglier.
- 1980 La bova dils Barschaus sballuna igl emprem sils 2 d'uost ed interrumpa per adina gl' access en Val Sumvitg. L'uniun fa quitaus muort buca saver transportar pavel da pever ellas starlieras ella Val Sumvitg. L'armada svizra ei prompta da sustener finanziamein in niev access. Strategicamein tuna denton la resonanza per ina nova piazza d'armas en Val Sumvitg. Alla radunonza dils 5 da settember propona in avdont da Val Sumvitg da fundar in'uniun da resistenza, ina schi numnada PRO VAL SUMVITG. Ella dueigi proteger a liunga vesta, cultira, patria, regiun e selvaschina. Incaricai vegnan igl iniziand Paul Mathias Cathomas da Val, Pieder Egloff, guardiaselvaschinas Christoffel Degonda da Cumpadilas ed ils gidonters Guido Maissen da Surrein e Werner Degonda da Cumpadials. Il prighel da lavinas e la resistenza sepagan e retegnan ils plans militars. Las speranzas ella nov'uniun paran aschia dad esser puntgadas en crap statteivel.?
- 1982 L'uniun fa in' excursiun ella Val Russein . La ravgia da tgauns furia. Per cumbatter quella vegnan las premias per catscha da laghetg alzadas sin 80 frs. per uolps e 40 frs. per fiergnas.
- 1984 Representada cun 15 dels viseta l'uniun il lag da Laus. Las empremas predas da catsch'aulta vegnan transcarradas atras il niev tunnel dils barschaus inaugoraus ils 9 d'october 1983.
- 1985 Suenter discussionar onns ora cugl uffeci forestal, retscheiva Chischnès, ni respectiv Fistatg ault la nova starliera, stada concludida gia igl onn 1977.
- 1987 L'uniun fa in' excursiun da stad si l'alp Glivers.
- Il sboz per la nova lescha da catscha vegn discussionaus cun tensiun fulminonta. Laud e degraziun sebrattan. Guardiaselvaschinas Werner Degonda da Cumpadials schazegia il diember da tschiarvas ella Cadi sin ca. 800 tocs.
- 1988 Ina leva unda da digren betscha la riva diventada profunda. Gl'ei l'emprema gada ell'existenza da gest 40 onns uniun Greina, che negins commembers novs entran e quater dattan schizun adia.
- 1989 La radunonza generala seregorda dil defunct fundatur e commember d'honor Placi Caplazi da Surrein, staus 51 onn fideivels all'uniun. Igl anteriur president da vischnaunca ei staus commember da tuttas treis secziuns da catschadurs

indigenas, numnadamein dall'uniun da vallada cul num GREINA, dall'uniun da catschadurs SUMVITG e dall'uniun da catschadurs GREINA.

Sin recumandaziun dil guardiaselvaschinas Werner Degonda, concluda la radunonza da baghegiar a Clavadi ina falla per pegliar e marcar vaccas-tschiarva.

- 1990 Strusch ei il torrent digl orcan VIVIAN vargaus, che gia in niev rampluna. La nova lescha da catscha va numnadamein en vigur. Entgins pissiunai catschadurs laian la patenta al Cantun. Auters ein fascinau dil diember da preda ussa pusseivels. Las caglias semultiplicheschan e las starlieras sesvidan.
- L'uniun crescha puspei en tensiun continuada. Ella noda 75 commembers. Da niev tarlischa schizun ina catschadura denteren.
- 1993 Per satisfar alla lescha forestala vegn la starliera en gl'ual da Puzzastg serrada. Quella lai dubitar d'esser presapauc vegn onns veglia.
- 1994 A Sutglatsher da vaccas entscheiva l'uniun ad erreger in biotop. Las lavurs s'extendan els onns sissu.
- L'uniun approbescha pigl onn proxim ils novs statuts. Da niev vegnan commembras e commembers classificai en categorias A, B e C.
- 1998 A Sumvitg vegn celebrau ils 6 da november ina messa en honur dil patrun veneratur da catscha, Sogn Hubert.
- 2001 Las empremas zonas da ruaus per selvaschinas duront gl'unviern, van en vigur.
- 2002 ( cun resalva in onn si e giu ) Il luftscher ver metta topa sin intschess sumvitges. El vegn traplaus en Vallesa els Plats da Fein e para sco che da recocnoszar la regiun per siu apparent pli grond e rapinus, il luf propi. Suenter 64 onns survivor senza saver tgei che quei seigi, inductan telefonins ed ils plans dil niev parc Adula, intschess dall'uniun GREINA.
- 2004 Il niev asil federal da selvaschinas cul num GREINA annecta il plaun la Greina e sias spundas. El vegn unius agl existent dil Péz Vial. Omisdus ensemen muntan ina surfatscha da 35.5 Km<sup>2</sup>. Da niev ein 3 vischnaucas cumpigliadas, numnadamein Vrin, Sumvitg e Medel/Lucmagn.
- Muort politica d'asils banduna in tschuppel buns commembers l'uniun. Carschen e digren fan concorrenza.
- 2005 Igl uors retuorna el Grischun. Ses extirpaders ein satrai ed ils vegnants suenter ein entusiasmai . Ella Val Mustair fa il cusseglier federal Moritz Leuenberger beinvegni al penetrant dil portal svizzer. Quel seigi gie "aschi innocents" . Paucs meins pli tard vegn il meini gia revedius e la bestia malgrada senumna gia LUMPAZI.
- 2007 Ina nova lescha da catscha va en vigur. La catscha annuala da decimar vegn mantenida. La vanagloria dils ins e la „giattamorta“ fruntan visavi ella medema uniun.

A Sulagval erregia l'uniun il baghetg numnaus Annexa.

- 2009 L'uniun fa catscha communabla cun 30 catschadurs ed ina catschadura .
- 2011 A catschaduras e catschadurs,tiradurs e tiraduras sburfla il meins da fevrer in' aurasut freida frontal en fatscha.La votaziun sur l'iniziativa d'armas ed il schurmetg da violenza van denton dall'aua giu. Ils fegls ed entginas feglias da Tell selegran.
- 2013 Enteifer ses 75 onns ei l'uniun carschida da 21 sin 95 commembers,e daniev era commembras. Rinforzada per varga quaterdubel fa ella igl october fiasta da giubileum. Cun respect a scret regorda ella dals 57 fundaturs directs ed indirects, dals 18 presidents e dalla presidenta e dals 5 survigiladers. Mo paucs dad els pli,han la cuida d'udir il resun da lur merets.

## ILS FUNDATURS (indica cul domicil da lu)

**Senza** \* ils originals da 1938

**Cun** \* ils indirects da 1939 tochen 1951, gl'onn cul dretg nativ pil num GREINA

BASELGIA Josef, Cumpadials	(1907-1977)
BASS Alfons, Clavadi,	(1919-1974) *
BASS Carli, Clavadi	(1925-1975) *
BASS Herman,Clavadi	(1918-1993)
BASS Isidor, Clavadi	(1921-2009)*
BASS Martin, Surrein	(1899-1996)
BASS Sigisbert, Surrein	(1905-1992)
BASS Teofil, Clavadi	(1917-1983)
BEARTH Placi, Sumvitg	?
BUNDI Alfred, Surrein	(1919-1999)*
BUNDI Georg, Surrein	(1905-1963)
BUNDI Gion Giusep, Surrein	(1880-1964)*
BUNDI Giusep Cumpadials	(1891-1972)*

CAJACOB Aluis, Sumvitg	(1906-1979)
CAJACOB Baseli, Sumvitg	(1918-1996)
CAJACOB Georg, Sumvitg, mistral,	(1880-1966)*
CAJACOB Josef, Sumvitg	(1918-1943) *
CANDINAS Albert, Surrein	(1927-2004)*
CANDINAS Alexander, Surrein	(1918-1995) *
CANDINAS Gion Giusep, Sumvitg	(1899-1994)
CAPLAZI Placi, Surrein,	(1899-1989)
CATHOMAS Placi, Surrein	(1903-1985)
CHISCHÈ Augustin, Sumvitg	(1892-1945) *
DECURTINS Christoffel, Cumpadials	(1918-1999)*
DEGONDA Anselm, Cumpadials	(1895-1973) *
DEGONDA Christoffel, Cumpadials	(1922-1996) *
DEGONDA Gion Battesta, Cumpadials	(1892-1972)
DEGONDA Otmar, Cumpadials	(1920-1995) *
DEPLAZES Augustin, Surrein,	(1922-2011) *
DEPLAZES Fridulin, Surrein	(1922-2008) *
DEPLAZES Gion Battesta, Surrein	(1889-1970)
DEPLAZES Gion Giusep, Surrein	(1900-1991)*
DEPLAZES Lucas, Sogn Bendetg	(1923-1988)*
DEPLZES Mathias, Sogn Benedetg	? *
DESAX Giusep, Surrein	(1914-1979)*
DUFF Isidor, Sumvitg ,	(1918, aunc en veta*
DUFF Tumaisch, Sumvitg	(1917-1967)*
GENAL Paul(i), Sumvitg	(1919,aunc en veta*
GIGER Luis, Laus	(1921-2000)*



GIGER Simeon, Surrein	(1920-2001) *
LOMBRIS Carli. Sumvitg	(1903-1985)
LOMBRISER Emil, Surrein	(1918-2001)*
MAISSEN Ludovic, Surrein	(1915-1944)*
MATHIUET Aluis, Cumpadials	(1900-1985)*
MATHIUET Christian, Cumpadials	(1905-1992)
MATHIUET Mathias, Cumpadials	(1902-1983)*
NAY Adalbert, Sumvitg	(1901-1945)
PALLY Luregn, Cumpadials	? *
SCHLANSER Isidor, Rabiis	(1914-1995)
SCHMID Theodor, Surrein	(1899-1993)
SCHMID Willibald, Surrein	(1908-1985) *
STEGER Emil, Sumvitg	(1926-2002) *
TGETGEL Josef, Surrein	(1921-2012)*
TSCHUOR Florian, Surrein	(1909-1997)
TSCHUOR Georg, Surrein	(1911-2001)
WENZIN Anton, Surrein	(1912-1985)*
WOLF Benedetg, Sumvitg,	(1918,morts*)

## **ILS PRESIDENTS E LA PRESIDENTA** (dapi 1938)

DEGONDA Gion Battista, da Cumpadials,  
1938,1939,1940,1941,1942 ed 1943, vivius da 1892-1972

BASS Alfons, da Clavadi,  
1944,1945,1946,1947 ed 1948. Vivius 1919-1974

DEGONDA Anselm, da Cumpadials,  
1949,1950,1951 ed 1952. Vivius 1895-1973

BUNDI Giusep, da Cumpadials,

1953 ed 1954. Vivius 1891 -1972

Bundi Alfred, da Surrein,  
1955 ed 1956. Vivius 1919-1999

DEGONDA Christoffel, da Cumpadials,  
1957, 1958, 1959, 1960, 1961 ed 8 ,meins da 1962 (elegius  
survigilader) Vivius da 1922-1996.

CANDINAS Albert, da Surrein,  
4 meins da 1962, 1963 ed 1964. Vivius da 1927-2004.

WALDER Leonard, da Rabiis  
1965, 1966, 1967 ed 1968. Vivius da 1925-2000.

CATHOMAS Paul Mathias, da Surrein/Val,  
1969 ed 1970.

BASS Toni, da Rabiis,  
1971 ed 1972. Vivius da 1945-2012.

MAISSEN Toni, da Surein,  
1973 ed 1974.

CANDINAS Placi, da Sumvitg,  
1975 ed 1976.

DECURTINS Augustin, da Cumpadials  
1977, 1978, 1979 ed 1980.

BASS Toni, da Rabiis, per la secunda gada,  
1981 ed 1982. Vivius da 1945-2012.

CANTIENI Clau, da Glion,  
1983, 1984, 1985, 1986, 1987 ed 1988.

BASELGIA Duri, da Rabiis, 10 onns, numnadamein  
1989, 1990, 1991, 1992, 1993, 1994, 1995, 1996, 1997 ed 1998.

CANDINAS Erwin, da Surrein,  
1999, 2000, 2001 e 2002.

DEPLAZES Martina, da Surrein,  
2003, 2004, 2005 e 2006.

TSCHUOR Roland, da Surrein  
2007, 2008, 2009, 2010, 2011 e 2012.

CANDINAS Robert, da Surrein,  
2013 ed actuals.

## **ILS SURVIGILADERS E GUARDIASSELVASCHINAS** (dapi 1938)

**DEGONDA Gion Battista**, Cumpadials, da ? entochen 1942 ni probabel sil pli ditg la primavera digl onn 1943. El fuva forester communal e dapi 1938 president dall'uniun da catschadurs SUMVITG. Sco forester e survigilader fuva el temius da finadin.

**PALLY Luregn**, Cumpadials, survigilader da 1943-1948. Malgrad auters temps fageva il scutinar "il Pally ei ella tiara" impressiun e las clicas da catschadurs sedividevan en pliras direcziuns.

**DEPLAZES Fridulin**, Surrein, survigilader da 1949-1961. El pudeva ir sco ina caura ed haveva sia atgna tactica. Cun secumparer adina o el liber, adverteva el enzaco sco rolla stativa che inductava il contuorn. Buca el traplava, mobein el leva vegnir traplaus per spindrar dil mal. Bein fuva l'optica da lu pli cuorta. Per el fuvan tuts buns carstgauns ch'ins astgava fidar.

**DEGONDA Christoffel**, Cumpadials, survigilader da 1962-1971 e dapi quella stad entochen 1986 guardiaselvaschinas e cau dil district 1 Rein anteriur (Cadi). Sco beinvulents alla selvaschina ha el augmentau ella Cadi ils 3 asils generals da selvaschinas sin 18. Era la catscha sezza ha profitau giudlunder. El ei staus igl iniziand digl asil federal cul num Péz Vial. Sut sia reschia han las colonias da capricorns entschiet sisum la Cadi. El fuva in bien tiradur. Sia logica fuva sauna, siu cunfar nuncumplicaus e sia forza lubeva da puder purtar sco in méi senza bastin. El fuva gentils, mo emblidava vess.

**DEGONDA Werner**, Cumpadials, dapi gl'atun 1986 guardiaselvaschinas actual, partsura dil district 1 Rein anteriur (Cadi) e da niev responsabels per l'entira Surselva. El continuescha il post da siu bab Christoffel, ei il 5avel survigilader enconuschents per gl'intschess da Sumvitg ed il tierz cun schlatteina Degonda.

Ella Cadi engrazian biaras zonas da ruaus per selvaschinas duront gl'unviern ad el sco iniziand e procuratur. Cun las premissas professionalas da preparatur, polizist ed anteriur luvrer dalla polizia criminala a Cuera, eis el sco predestinaus per siu uffeci. El fida pauc, ha il dun d'empalar e d'organisar, sa esser dapertut, ei capavels e vegn ordlunder.

## TENDENZAS E CUNTRASTS

Enteifer 7 decennis ei la catscha semidada dal mied da dustar la fom al cunfar da tgira, peda e recreaziun sportiva. A dual reflecta era l'uniun oz ina manifestaziun influenta.

Ier fagevan ils catschadurs la radunonza ed oz fa la radunonza ils catschadurs e catschaduras. Resch niev ei bein sco las dunnas han suatiu ils representants virils dil „hommo sapiens“ e per part vargadas ils catschadurs collegas !

Avon 75 onns han nos antanats temiu il „tissi da revier“ che periclitava la libra catscha da patenta. Oz e damaun stuein nus plitost temer il revier apparent. Gl' ei da sperar che las generaziuns giuvnas seigien stgisas da zavrar il graun dalla paglia sco nos fundaturs han fatg per nus.

Ei dess aunc biaras episodas da scriver sur persunas ed activitads dall'uniun GREINA. Bialas e macortas, carteivlas e latinusas. Il scop vala denton per tuts temps passentai; il bi ella veta schazegia ins buca quei mument ch'ins gauda el, mobein per quei di ch'el tuorna mai pli.

A dual ha in ch' ei tuttina vegls sco l'uniun giubilonta e 53 onns commember, empruvau ina reflecziun dad ier per damaun.

Engraziament allas suandontas fontaunas :

Cudisch da quen Uniun da catschadurs SUMVITG naven da 1938-1955.

Cajacob Anton, Sumvitg, pertuccont memoria da persunas e lur cuoz da veta.

Caminada Arnold, Ligiazium, Vrin, guardiaselvaschinas, pertuccont asils federalis.

Candinas Conrad, Surrein, evidenza per onns da veta e da naschientscha sur da persunas defunctas e viventas.

Degonda Werner, Cumpadials, guardiaselvaschinas e commember; indicaziuns sur asils generalis - e federalis da selvaschinas, da zonas da ruaus per selvaschinas duront gl'unviern e per cronologia d'uffecis da survigilanza sin territori dall'uniun. Cun siu agid ei questa lavur vegnida enrihida.

Historia e perscrutaziun dallas UNIUNS DA CATSCHADURS vischinontas, principalmein dalla TUMPIV.

Als 2 cudischs da protocols dall'Uniun da catschadurs GREINA.

Raquents da trapassai a gl'autur discuors cun persunas cumpetentas e secundarmein la memoria dil cronist.